
GAVAUDAN LE VIEUX.

I.

L'AUTRE dia per un mati
Trespasava per un simmelh,
E vi dejos un albespi,
Encontra'l prim rai del solelh,
Una toza que m ressemet
Silh cui ieu vezer solia;
E destolgui m de la via
Vas lieys rizen, me salutet.

Totz jauzions, de mon rossi
Dessendey jos sobr' el gravelh;
E pres me pel ponh, josta si
Assec me a l'ombra d'un telh;
Et anc novas no m demandet:
No sai si me conoissia;
Ilh, oc: per que us o mentria,
Qu'els huelhs e la boca m baizet.

Per pauc de joy no m'endurmi,
Quan mi toqueron siey cabelh.
« Bella, fi m'ieu, cum etz aissi!
D'ombre dieus crei que m'o parelh. »

« Senher, oc, quar nos ajustet;
Qu'al re no vuelh ni queria,
E si us platz a mi plairia
So don hom pus me castiet. »

« Amiga, segon qu'ieu devi,
Tort n'ey, si jamais m'en querelh;
Pus tan privada etz de mi,
Dir vos ey mon privat cosselh:
Amors m'a tout so que m donet
Selha que mout m'abellia;
Ar no sey vas on se sia,
Per qu'anc res pueis no m conortet. »

« Senher, tan sui d'aquest lati,
Per que la nuech cossir e velh;
Anc pueis pus de vos me parti,
Li mey huelh no preiron sonelh.
Mal o fey qui tan vos lonhet,
E res sos faitz non l'enbuia,
Que la vostra companhia
Estara mielhs qu'anc non estet. »

« Amiga, per bon endesti
Crey que m det dieus aquest parelh
Joy de cambra en pastori,
Que m'es dous, don me meravelh;
Et ancmals tan be no ns anet
Vostra merce e la mia;

Yssit em d'autra baylia,
Et amors en mi no s pecquet. »

« Senher, NA Eva trespasset
Los mendamens que tenia,
E qui de vos me castia
Aitan se muza en bavet. »

.....

II.

CREZENS, fis, verays et entiers
Fui vas mi dons tos temps senhor,
Et ilh portava m tan d'onor,
Qu'anc un jorn son joy no m'estrais;
Desaventur'aras lo m trais
Que sap tot lo mon escarnir.
Falsa mortz, que ns a faitz partir
Mi e mi dons, dieus lieys ampar!

Mielhs fora qu'ieu muris primiers
Que ses joy viure ab dolor;
Que perdud ay la bellazor
Dona, qu'anc fos ni er jamais;
Per qu'ay ira, dols e pantais.
Mortz, cum pogues mi dons aussir!
Que totz lo mons degra jauzir
Sas beutatz, e'l joys remirar.

Dona, per vos mos deziriers
M'aportava de joy sabor,
Ara no m val joi ni m soccor;
Qu'ira m met al cor tan gran fais,
Quan suy en pes cazer mi lais,
E no m puesc nafrar ni delir;
Dona, mais volgr' ab vos murir
Ab joi, qu'ab ira forsenar.

Tant estranhs es mos cossiriers,
Nuech e jorn planc, sospir e plor,
Caitius, desheretatz d'amor,
Ses joy, dolens que d'ira m pais;
E par ben al front et al cais:
Jove saur vielh encanezir,
Cazer, levar e tressalhir,
Me fai ira vius mortz anar.

Jamais no serai prezentiers,
Que perdut ey pretz e valor;
Estar ses joy a deshonor!
Ja d'ombre dieus viure no m lais:
Quec jorn afenisc et abais,
Qu'ira no m pot del cor yssir;
Quan pes de joy per esbaudir,
Tot lo sen pert e m desampar.

Totz autres joys m'es encombriers,
Tant ai lo cor plen de tristor;

Perdud ai vergonha e paor,
Ybres auras vau ybriaais;
Ja dieus no m do per qu'ieu engrais,
Ni m lais mais ad amor servir;
Mais vuelh mon cor pessen blezir:
Tos temps serai tortres ses par.

Domna, grans joys, grans alegriers
Vos met' al renc del cel aussor,
Ab los angels que fan lauzor,
Aissi cum sanhs Johans retrais;
Qu'anc fals lauzengiers brus ni sais
Non poc un söl de vos mal dir;
Ni eu no sabria issernir
Los vostres bos aibs ni cömtrar.

Jehus vos fassa 'l sieu servir
El cel clar paradis remplir,
Entre las verjes coronar.

Quar Gavaudas no pot fenir
Lo planch, ni 'l dol qu'el fa martir,
Jamais res no 'l pot conortar.

G A V A U D A.

2701 , 7226.

DESEMPARATZ , sés companho ,
E d'amors lonh del tot e blos ,
Cavalgava per un cambo ,
Iratz e tristz e cossiros ,
Lonc un broill , tro jois me retene
D'una pastorela que vi :
Per qu'es mos jois renovelatz
Quan mi remembre sas beutatz ,
Que anc pos d'otra no m sovenc.

Tost descendei sobre'l sablo
E venc vas lieis de saut coitos
Ella m dèrs un pauc lo mento ,
Ab un dos ris , ferm , amoros ,
Me dis : senher , cossius avenc
Queus trartornessetz sai ves mi ?
Cous es tan de mi azautatz ?
Qu'ieu no sai que s'es amitatz ,
Per que m lonh de vos e m'estrene.

Toza , joi mi dona razo
Per qu'ieu soi sà vengutz à vos.
Quan mi mostretz vostra faisso
Sobre totz jauzens fui joios.
Per que mon cors fortz e destrene
Ab vostr'amor , ves cui m'acli ;
E sia volgutz et amatz
Lo mieu jois e'l vostre sius platz ,
Que jamais no rompa ni trenc.

Senher, si m'amistat vos do
Ieu. aurai nom na Malafos ;
Qu'ieu n'esper melhor guiardo
D'autre, qu'ieu cug qu'en breu m'espos.
Dar vos ai est cairel que tenc,
E tornatz en vostre cami,
Qu'ab autras vos es ensaiatz
Per semblan, don etz galiatz,
Falsas que fan ric joi sebenc.

Amiga, nous dis oc ni no
De las falsas ab cor ginhos.
Tan mi platz de vos e m sap bo,
Que totz mals avers m'en es pros.
En qual queus voillatz vos o prenc,
Que ieu vos plevisc eus afi
Que vostre soi endomenjatz ;
E fatz de mi so queus voillatz,
Neis traire lo cor ab un brenc.

Senher, qui messonjas a pro
A semblan de ver non es tos :
La saviez' à Salamo
Aondera ; s'amors no fos,
Que mur e forsa e palenc
Fe de sen ; et un frach bassi
No valc quan fon apoderatz :
E pos el ne fon enganatz,
Gardatz en vos so qu'ieu ne prenc.

Amiga, ab autr'ocaizo
Mi tornas mon joi sus dejos ;
Que ja non er ni anc no fo
Qu'amors no sia bon'als bos.
Per qu'ieu de ben amar no m fenc
Que m don'al cor joi clar e fi
De vos ; e prec merce m'aiatz,
O m metrei, si m'o alongatz
Hermitas él poig Denisenc.

Senher, ni prezic ni sermo
Non aia mais entre nos dos ;
Si m'es amics amigaus so,
Quar tan n'es lecs et envejós.
Ieu geti foras et espenc
De mon cor brau orgolh comgi.
Tot aissi com vos deziratz
Er mos joi al vostre privat ;
Que ses joi no val un arenc.

Amiga, ab tant ai assatz
Per mil vetz s'es mon joi doblatz,
Quar en la vostr'amor atenc.

Senher, e vos non o digatz,
Si tan dur cor adomesjatz,
Als parliers gola de lastenc.
